

Saturday, February 21, 2026

Time - 2:30pm - 2:35pm

AKASHVANI AIZAWL

REGIONAL NEWS UNIT

ADVISER TO CM

Adviser to Chief Minister (Implementation of Handholding Scheme) Dr. KC Lalmalsawmzauva chuan ei leh bara intodelhna tur leh kuthnathawktute thlai tharchhuah man man zawka tihral thin a nih theih nan Mizoram Sawrkar chuan Bana Kaih Scheme chu tangkai taka a hman mek thu a sawi.

Vawiina I&PR Auditorium, Aizawla Ministry of Food Processing Industries, Government of India hnuaiia Federation of Industry & Commerce of North Eastern Region (FINER) bultuma 'Regional Interaction Meet of Food Processing Industry' buatsaih a hmanpuinaah he thu hi Adviser to CM chuan a sawi a. Kuthnathawktute thlai tharchhuahte vawn that nan leh him dam taka thawnchhuah nan vawiin thutkhawm thupui 'Packaging' chu thil pawimawh leh tangkai tak a nih thu a sawi a. Eitur leh bungrua tuamna te chu a chhung ami a vawn that mai bakah customer-te hipna pawimawh tak a nih thu sawiin, a leitu tur ten an hriattur pawimawh tak tak tarlanna a nih bawk thu a sawi a. ei leh bar a intodelhna turin leh kuthnathawktute thlai tharchhuah man man zawka tihral thin a nih theih nan Mizoram Sawrkar chuan Bana Kaih Scheme chu tangkai takin a hman mek thu a sawi a. Phase -1 ah kuthnathawktuten Bana Kaih Scheme hnuaiia thlai thlan chhuah bik, Sawhthing, Aieng, Hmarchate leh Hmunphiah thar chhuah kawngah hmasawna hmuh a nih thu tarlangin, Phase 2 ah hian thlai tharchhuahte tha taka sawngbawl hna, 'Processing' ah tan lak chhoh zel tum a nih thu a sawi a ni.

Dr. KC Lalmalsawmzauva tarlan danin Bana Kaih Scheme Phase 1 kalpui chhung khan Progress Partner 392 hnenah Loan pek a nih thu leh Progress Partner 2713 hnenah CM Special Package sem chhuah a nih bawk thu a sawi a. Phase 2 kalpui mekah hian Progress Partner 917 te thlanchhuah an nih leh tawh thu sawiin Progress Partner tha leh rintlak thlanchhuah hna hi kalpui chhunzawm zel a nih thu a sawi a ni.



CYMA GS

Central YMA General Secretary Prof. Malsawmliana chuan ruihhlo la ti lo te venghim turin Kohhran huangchung leh chhungkua atanga inzirtir a tul thu a sawi.

Lengpui Model Branch YMA in nimina YMA Kumpulan, 'Ruihhlo Do' hawna hun an buatsaih a hmanpuinaah he thu hi sawiin Prof. Malsawmliana chuan YMA chu khawtlang hmachhuan a nih thu leh YMA a chak loh chuan khawtlangah sualna pawh a lo pun thin thu a sawi a. Ruihhlo la ti lo te venhim kawngah Kohhran

huangchhunga inzirtirna leh Chhungkua atanga inzirtir a tul thu sawiin YMA Kumpulan Kaihruaina in a phut angin Chhungkaw Zan siama inzirtirna hun hmang theuh turin mipuite a chah bawk.

Central YMA General Secretary chuan mahni hnampui ngei nupui pasal neih chu hnam himna a nih thu a sawi a. Hmakhaw thlir uluk a ngai tih sawiin Mizo chu hnam tlemte an nih avangin mahni hnam pui ngei neih a pawimawh tih a sawi a. Nu leh paten mahni fate nupui pasal zawn kawngah fimkhur pui a ngai tih sawiin hnam rilru put a pawimawh thu a sawi a ni.



EKTA DIWAS

Tukin dar 6:30 khan Art & Culture Department, Govt. Of Mizoram chuan Ministry of Culture, Govt. of India atanga thu an dawn angin Ekta Diwas Unity Run & Cycling, a huhoa tlan leh thirsakawr khalh hun an hmang.

Sorkar laipui chuan State leh Union Territory zawnzawngte Sardar Vallabhai Patel (Union Home Minister hmasa ber leh Iron Man of India tia hming an vuah hial) pian champhaphak kum 150-na hriatreng nan October ni 31, 2024 leh October ni 31, 2026 inkara hun hman dan tur hrang hrang a rawn duang a. Hemi hnuaiah hian Ekta Diwas thupui 'One India, Self-Reliant India' tih hmangin Art & Culture Department chuan Unity Run & Cycling chu Mizoram Cycling Association leh Aizawl City Run Club te thawhpuiin a buatsaih a. Mi 140 vel tlanin, Cyclists mi 55 an tel bawk a ni.

He hun hmanpuitu zinga mi IGP Pu Seju P. Kuruvilla chuan thu sawiin, India ramin inremna leh thawhhona tha a mamawh thu a sawi a, hemi bakah hian thawkho tur chuan hriselna ngaih pawimawh a tul thu sawiin, Unity Run & Cycling-a tel zawnzawngte chu taksa enkawl tha theuh turin a chah a ni.



CYMA CADS

Central YMA chuan kar hmasa chungkhan Heroin hawng 33 an man a, hemi kaihnawihah hian mi 41 man an ni bawk.

Central YMA hnuaia CADS chuan February ni 14 leh February ni 20 inkar khan No. 4 : Hawng - 33, Tictac bur – 38, damdawi thahnem tak bakah Ruihhlo kaihnawihah hian mi 41 an man tel a, Excise and Narcotics kutah mi 4 hlan an ni a, Home ah mi 3 dah luh an ni bawk.

